

Sachchī Qurbāngāh



sachchī qurbāngāh

The True Altar

by Bakhtullah

[*Ao, Khud Dekh Lo 20*]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a collage of

R. Gunther <https://freebibleimages.org/illustrations/ls-cain-abel/>;

geralt [https://pixabay.com/cs/illustrations/abstraktn%C3%AD-](https://pixabay.com/cs/illustrations/abstraktn%C3%AD-barvit-akvarel-1076264/)

[barvit-akvarel-1076264/](https://pixabay.com/cs/illustrations/abstraktn%C3%AD-barvit-akvarel-1076264/).

Bible quotations are from UGV.

for enquiries or to request more copies:

askandanswer786@gmail.com

Fahrist

Merī Najāt Qabūl Karo	2
Merī Hifāzat Qabūl Karo	4
Ḳhudā Bāp kī Gāranṭī Qabūl Karo	5
Allāh ke Farzand ko Qabūl Karo	9
Sachchī Qurbāngāh Qabūl Karo	11
Kyā Āpko Yih Najāt Milī Hai?	13
Injīl, Yūhannā 10:22-42	14

Sardiyon̄ k̄a mausam thā. Maḥsūsiyat kī Īd ke bāis Baitul-muqaddas aur logoṅ ke ghar be-shumār charāghoṅ se chamak-damak rahe the.

► *Yih kis qism kī īd thī?*

Taqriban do sau sāl pahle ek pardesī bādshāh ne Baitul-muqaddas kī qurbāngāh par but lagākar uskī be-hurmatī kī thī. Yih dekhkar Yahūdiyon̄ ne us par fath pākar qurbāngāh ko nae sire se maḥsūs kiyā thā. Yih īd isī maḥsūsiyat kī ḡhushī meṅ manāī jāti thī. Ham dekheṅge ki is īd k̄a Īsā Masīh se gahrā tālluḡ hai.

Īd ke daurān Īsā Masīh Baitul-muqaddas meṅ āyā. Jab wuh wahān ke ek barānde meṅ ṡahal rahā thā to log use gherkar kahne lage, “Āp hameṅ kab tak uljhan meṅ rakheṅge? Agar āp Masīh haiṅ to

hameñ sāf sāf batā deñ.” Īsā Masīh ne jawāb meñ kyā kahā? Pahlī bāt,

Merī Najāt Qabūl Karo

► *Kyā Ḳhudāwand Īsā ne apne kām aur kalām se sābit nahīn kiyā thā ki wuh al-Masīh hai?*

Zarūr.

► *To yih log kyon chāhte the ki wuh sāf sāf batā de ki main Masīh hūñ?*

Jo kuchh Īsā Masīh ne kiyā thā wuh un ke nazdīk nākāfī thā. Un ke ḳhyāl meñ al-Masīh Romī dushman kā juā toṛkar Yahūdī qaum ko āzād karegā. Wuh ek duniyāwī hākim chāhte the, islie un kī āñkheñ Īsā Masīh ke aslī kirdār ke lie band rahīn. Wuh mānte to the ki āne wālā Masīh shafā degā aur dūsre mojize karegā. Lekin wuh is bāt ke lie andhe the ki Ḳhudāwand Īsā ke āne kā awwal maqsad kyā thā.

► *Awwal maqsad kyā thā?*

Awwal maqsad yih thā ki insān ko najāt de—gunāhoñ se najāt.

► *Yih kyon us ke āne kā awwal maqsad thā?*

Apne gunāhoñ kī wajah se ham pāk Ḳhudā ke huzūr mañzūr nahīñ ho sakte. Islie zarūrī hai ki ham gunāhoñ se āzād ho jāēñ. Āj bhī aksar log Īsā Masīh ke mojize pasand karte haiñ. Lekin kam hī uskā awwal maqsad qabūl karte haiñ. Kam hī apne gunāhoñ se āzād hokar Ḳhudā ke huzūr mañzūr ho jāte haiñ. Isī lie Īsā Masīh ne jawāb diyā,

Maiñ tum ko batā chukā hūñ, lekin tum ko yaqīn nahīñ āyā. Jo kām maiñ apne Bāp ke nām se kartā hūñ wuh mere gawāh haiñ. Lekin tum imān nahīñ rakhte kyonki tum merī bhereñ nahīñ ho. (Yūhannā 10:25-27)

► *Jo imān na lāe kyā wuh Īsā Masīh kī bhereñ the?*

Nahīñ.

► *Is se ham imān ke bāre meñ kyā sīkhte haiñ?*

Imān achchhe charwāhe ke sāth rishtā hai— bheṛ kā rishtā jis kī āñkheñ hameshā apne āqā

kī taraf lagī huī haiñ. Shāgird wuh hai jo uskī āwāz sunkar us ke pīchhe chaltā hai. Sab ne uskā kalām aur us ke kām dekh liyā thā. Lekin sab īmān na lāe. Jo īmān na lāe un kā achchhe charwāhe se rishtā paidā na huā. Unhīn ko Īsā Masīh ne kahā ki merī najāt qabūl karo. Lekin unhoñ ne inkār kiyā. Dūsri bāt,

Merī Hifāzat Qabūl Karo

Us ne farmāyā,

Merī bheṛeñ merī āwāz suntī haiñ. Maiñ unheñ jāntā hūñ aur wuh mere pīchhe chaltī haiñ. Maiñ unheñ abadī zindagī detā hūñ, islie wuh kabhī halāk nahīn hoñgī. Koī unheñ mere hāth se chhīn na legā.

(Yūhannā 10:27-28)

- ▶ *Yahān Īsā Masīh kaun-sī taswīr istemāl kartā hai?*
Charwāhe aur bheṛoñ kī taswīr. Wuh achchhā charwāhā hai.
- ▶ *Uskī bheṛeñ kaun haiñ?*

Us par īmān lāne wāle.

► *Yih bheṛeṅ kyā kartī haiṅ?*

- Wuh uskī āwāz suntī haiṅ.
- Wuh us ke pīchhe chaltī haiṅ.

► *Charwāhā kyā kartā hai?*

- Wuh unheṅ jāntā hai.
- Wuh unheṅ abadī zindagī detā hai.

► *Abadī zindagī kā kyā natijā nikaltā hai?*

- Uskī bheṛeṅ kabhī halāk nahīṅ hoṅgī.
- Koī unheṅ us ke hāth se chhīn na legā. Uskī bheṛeṅ us ke hāth meṅ haiṅ. Islie wuh mahfūz haiṅ.

Īsā Masīh kī najāt pāne se hamenṅ abadī hifāzat miltī hai. Tīsṛī bāt,

Ḳhudā Bāp kī Gāranṭī Qabūl Karo

Jab Īsā Masīh hamārā charwāhā hai to hamenṅ najāt aur hifāzat miltī hai. Lekin ham kis tarah yaqīn rakh sakte haiṅ ki yih hifāzat pakkī hai? Ab Īsā Masīh is sawāl kā jawāb detā hai,

Kyonki mere Bāp ne unheñ mere supurd kiyā hai aur wuhī sab se baṛā hai. Koī unheñ Bāp ke hāth se chhīn nahīn saktā. Maiñ aur Bāp ek haiñ. (Yūhannā 10:29-30)

- ▶ *Kaun hamārī hifāzat kī gāranṭī detā hai?*
Ḳhudā Bāp. Usī ne bheṛeñ apne Farzand ke supurd kī haiñ.
- ▶ *Uskī gāranṭī kyon ṭhos hai?*
Islie ki wuh sab se baṛā hai.
- ▶ *Lekin Ḳhudā Bāp kyon bheṛoñ kī gāranṭī detā hai?*
Islie ki Īsā Masīh aur Bāp ek haiñ. Yon un kā ek hī irādā aur ek hī kām hai. Yih sunkar log patthar uṭhāne lage tāki use sangsār karen.
- ▶ *Wuh Īsā Masīh ko kyon qatl karnā chāhte the?*
Īsā Masīh ne bhī yahī sawāl pūchhā,

Maiñne tumheñ Bāp kī taraf se kā ilāhī nishān dikhāe haiñ. Tum mujhe in meñ se kis nishān kī wajah se sangsār kar rahe ho? (Yūhannā 10:32)

► *Ilāhī nishān se kyā murād hai?*

Īsā Masīh ke mojize ilāhī nishān the, kyonki yih zāhir karte the ki Īsā Masīh ko Ḳhudā Bāp se bhejā gayā hai. Anginat mojize hue the jo sirf Ḳhudā kī taraf se ho sakte the. Yahī zāhir karte the ki wuh aur Bāp ek haiñ. Ki jo bhī wuh kar rahā hai wuh Ḳhudā Bāp kī taraf se hai.

► *Us ke muḳhālifoñ ne kyā jawāb diyā?*

Unhoñ ne jawāb diyā ki tum ne kufr bakā hai. Tum jo sirf insān ho Allāh hone kā dāwā karte ho. Yih ek sanjīdā ilzām thā islie lāzim hai ki ham us par ḡhaur karenñ jo Īsā Masīh kahnā chāhtā thā.

► *Ḳhudā Bāp aur Īsā Masīh kis tarah ek haiñ?*

● Īsā Masīh kahnā chāhtā hai ki irāde aur kām meñ ham ek haiñ. Maiñ Ḳhudā Bāp kī marzī ke alāwā aur kuchh nahīñ kartā. Iskā matlab yih nahīñ hai ki maiñ Ḳhudā Bāp hūñ. Ham farq haiñ aur ek bhī haiñ. Wuh Ḳhudā Bāp

hai aur main Farzand hūn. Usī ne mujhe duniyā meñ bhejā tāki insān ko najāt dūn.

- Īsā Masīh na sirf insān hai. Wuh Ḳhudā kā Farzand hai jis ne insān banane kā rāstā iḳhtiyār kiyā tāki hamēñ najāt de. Yoñ wuh Ḳhudā kā Farzand bhī hai aur insān bhī. Insān kī haisiyat se us ne hamārī sazā bardāsht kī tāki hamāre gunāh miṭ jāēñ. Farzand kī haisiyat se wuh jī uṭhā aur āsmān par uṭhā liyā gayā. Yoñ jo bhī uskī āwāz sune wuh us ke pīchhe chalkar ek din jī uṭhegā.

Yahī bāt hamēñ najāt kī tasallī detī hai. Hamāre nek kām hamēñ yih tasallī nahīn dilā sakte ki ham jannat meñ dāḳhil ho jāēnge. Ḳhudā Bāp hī is kī gāranṭī hai. Wuh farmātā hai ki najāt kā jo kām mainne apne Farzand ke wasīle se kiyā wuh pakkā hai. Main hī uskī gāranṭī detā hūn.

Īsā Masīh ke muḳhālif us ke mojize qabūl kar sakte the. Lekin wuh yih qabūl nahīn kar sakte the ki

aise mojize sirf Ҷhudā kā Farzand kar saktā hai. Āj tak bahut-se log yih bāt qabūl nahīn kar sakte.

► *Kyā āp yih qabūl kar sakte hain?*

Uskī āwāz suno. Ҷhudā Bāp kī gāranṭī qabūl karo. Chauthī bāt,

Allāh ke Farzand ko Qabūl Karo

Phir bhī Īsā Masīh ne muḵhālifoñ ke zahnoñ ko kholne kī koshish kī. Us ne farmāyā,

Kyā yih tumhārī sharīat meñ nahīn likhā hai ki Allāh ne farmāyā, ‘Tum Ҷhudā ho’? Unheñ ‘Ҷhudā’ kahā gayā jin tak Allāh kā yih paighām pahuñchāyā gayā. Aur ham jānte hain ki kalām-e-muqaddas ko mansūkh nahīn kiyā jā saktā. To phir tum kufr bakne kī bāt kyon karte ho jab main kahtā hūn ki main Allāh kā Farzand hūn? (Yūhannā 10:34-36)

► *Yih kaun-sā hawālā hai jis kā zikr Īsā Masīh ne kiyā?*

Yahān us ne ek zabūr kā zikr kiyā. Wahān likhā hai,

Be-shak mainne kahā, “Tum Ẹhudā ho, sab Allāh Ta’ālā ke farzand ho. Lekin tum fānī insān kī tarah mar jāoge, tum dīgar hukmrānoñ kī tarah gir jāoge.” (Zabūr 82:6)

► *Is zabūr kā kyā matlab hai?*

Sharīat ke Yahūdī ustād muttāfiq the ki Ẹhudā ne yih bāt Isrāīlī jamāt se farmāī thī.

► *Isrāīliyoñ ko kis tarah kahā jā saktā thā ki tum Allāh ke farzand ho?*

Un par sharīat nāzil huī thī isī lie wuh Ẹhudā jaise yānī us ke farzand the. Sharīat ne unheñ yih rob aur waqār dilā diyā thā. Lekin apnī nā-farmānī kī wajah se Yahūdī yih rob aur waqār kho baiṭhe the. Islie zabūr kahtā hai ki tum fānī insān kī tarah mar jāoge.

► *Īsā Masīh yahān kyā kahnā chāhtā hai?*

Jab sharīat nāzil huī to tumheñ itnā rob milā ki Allāh Ta'ālā ke farzand kahā gayā. Lekin tum is lāyq na rahe. Isī lie main duniyā meñ āyā. Zarūrī thā ki Ḳhudā kā Farzand nāzil ho jāe tāki tum achchhe charwāhe kī bhereñ ban jāo. Lāzim thā ki Ḳhudā kā Farzand nāzil ho jāe tāki tum Ḳhudā ke ḳhāndān meñ shāmīl ho jāo. Pānchwīn bāt,

Sachchī Qurbāngāh Qabūl Karo

Īsā Masīh kī bāteñ hameshā barī gahrāiyōñ meñ le jātī haiñ. Ab us ne farmāyā,

Āḳhir Bāp ne ḳhud mujhe maḳhsūs karke duniyā meñ bhejā hai.

(Yūhannā 10:36)

► *Is ke pīchhe kyā ḳhyāl hai?*

Maḳhsūsiyat kī Īd thī. Us par yih yād kiyā jātā thā ki be-hurmatī ke bād qurbāngāh ko nae sire se maḳhsūs kiyā gayā thā. Ab Īsā Masīh ne farmāyā ki mujhe hī maḳhsūs kiyā gayā hai. Jis

qurbāngāh kī maḥsūsiyat tum manā rahe ho wuh ab be-mānī hai.

► *Kyon?*

Qurbāngāh wuh intazām thā jis se insān kā Ḳhudā se mel-milāp ho jātā thā. Usī par log apnī qurbāniyān pesh karte the tāki Allāh Ta'ālā un ke gunāh māf kare. Lekin Baitul-muqaddas kī qurbāngāh haqīqat kā bas sāyā thā. Sāyā asl kām nahīn kar saktā. Wuh sirf asl kī taraf ishārā kartā hai. Kisī ādmī kā sāyā us ādmī kā kām nahīn kar saktā. Sāye ko dekhkar shāyad hī ham ādmī kī shakl kā andāzā lagā sakeñ. Na yih sāyā sāns le saktā hai na hāth-pānw hilā saktā hai. Ab Īsā Masīh meñ sāye kā asl ā gayā thā. Wuh sachchī qurbāngāh hai. Use maḥsūs karke duniyā meñ bhej diyā gayā thā tāki uskī qurbānī Ḳhudā se haqīqī mel-milāp paidā kare.

► *Kyā log yih sunkar ḳhush hue?*

Nahīn. Yih sunkar unhoñ ne use pakaṛne kī
koshish kī. Lekin wuh un ke hāth se nikal gayā.
Ek ākhirī bāt,

Kyā Āpko Yih Najāt Milī Hai?

Yarūshalam meñ rahnā mushkil ho gayā thā islie
Īsā Masīh apne shāgirdoñ ke sāth Dariyā-e-Yardan
ke pār us jagah chalā gayā jahān Yahyā nabī shurū
meñ baptismā diyā kartā thā. Wahān bahut-se log
us par īmān lāe.

► *Log kyon us par īmān lāe?*

Unhoñ ne kahā,

Yahyā ne kabhī koī ilāhī nishān na
dikhāyā, lekin jo kuchh us ne is ke
bāre meñ bayān kiyā, wuh bilkul
sahī niklā. (Yūhannā 10:41)

Yih log pahle Allāh ke paighambar Yahyā par
īmān lāe the, aur ab unhoñ ne dekhā ki har ek
bāt jo Yahyā ne Īsā Masīh ke bāre meñ farmāī
thī sahī niklī hai.

► *In men aur Īsā Masīh ke muḵhālifoñ men kyā farq thā?*

Kāfī der se yih log pahchān chuke the ki Allāh, Yahyā nabī ke wasīle se bāt kar rahā hai. Ab unhoñ ne yahī bāt Īsā Masīh men pāī. Unhoñ ne uskī najāt aur hifāzat qabūl kī. Wuh jānte the ki yih najāt pakkī hai kyonki Ḳhudā Bāp is kī gāranṭī detā hai.

Dūsroñ ne Īsā Masīh kī najāt qabūl na kiyā. Wuh uskī āwāz nahīñ sun sakte the, aur uskī bheṛeñ na bane. Na sirf yih balki wuh us ke saḵht muḵhālif ban gae.

Ab sawāl yih hai: Kyā āpne najāt pāī hai? Kyā āp achchhe charwāhe ke pīchhe chalkar apne āpko mahfūz samajhte haiñ? Kyā āpko pūrā yaqīn hai ki Ḳhudā Bāp is najāt kī gāranṭī detā hai? Kyā āpne us ke Farzand kī qurbānī qabūl kī hai?

Injil, Yūhannā 10:22-42

Sardiyon kā mausam thā aur Īsā Baitul-muqaddas kī maḥsūsīyat kī Īd banām Hanūkā ke daurān Yarūshalam meñ thā. Wuh Baitul-muqaddas ke us barāmdē meñ phir rahā thā jis kā nām Sulemān kā barāmdā thā. Yahūdī use gherkar kahne lage, “Āp hameñ kab tak uljhan meñ rakheñge? Agar āp Masīh haiñ to hameñ sāf sāf batā deñ.”

Īsā ne jawāb diyā, “Maiñ tum ko batā chukā hūñ, lekin tum ko yaqīn nahīñ āyā. Jo kām maiñ apne Bāp ke nām se kartā hūñ wuh mere gawāh haiñ. Lekin tum imān nahīñ rakhte kyonki tum merī bheṛeñ nahīñ ho. Merī bheṛeñ merī āwāz suntī haiñ. Maiñ unheñ jāntā hūñ aur wuh mere pīchhe chaltī haiñ. Maiñ unheñ abadī zindagī detā hūñ, islie wuh kabhī halāk nahīñ hongī. Koī unheñ mere hāth se chhīn na legā, kyonki mere Bāp ne

unheñ mere supurd kiyā hai aur wuhī sab se barā hai. Koī unheñ Bāp ke hāth se chhīn nahīn saktā. Main aur Bāp ek haiñ.”

Yih sunkar Yahūdī dubārā patthar uṭhāne lage tāki Īsā ko sangsār karen. Us ne un se kahā, “Mainne tumheñ Bāp kī taraf se kaī ilāhī nishān dikhāe haiñ. Tum mujhe in meñ se kis nishān kī wajah se sangsār kar rahe ho?”

Yahūdiyon ne jawāb diyā, “Ham tum ko kisī achchhe kām kī wajah se sangsār nahīn kar rahe balki kufr bakne kī wajah se. Tum jo sirf insān ho Allāh hone kā dāwā karte ho.”

Īsā ne kahā, “Kyā yih tumhārī sharīat meñ nahīn likhā hai ki Allāh ne farmāyā, ‘Tum Ḳhudā ho’? Unheñ ‘Ḳhudā’ kahā gayā jin tak Allāh kā yih paighām pahuñchāyā gayā. Aur ham jānte haiñ ki kalām-e-muqaddas ko mansūkh nahīn kiyā jā saktā. To phir tum kufr bakne kī bāt kyon karte ho jab main kahtā hūñ ki main Allāh kā Farzand hūñ? Ākhir Bāp ne

ḳhud mujhe maḳhsūs karke duniyā meñ bhejā hai. Agar main apne Bāp ke kām na karūñ to merī bāt na māno. Lekin agar us ke kām karūñ to be-shak merī bāt na māno, lekin kam-az-kam un kāmōñ kī gawāhī to māno. Phir tum jāñ loge aur samajh jāoge ki Bāp mujh meñ hai aur main Bāp meñ hūñ.”

Ek bār phir unhoñ ne use giriftār karne kī koshish kī, lekin wuh un ke hāth se nikal gayā. Phir Īsā dubārā Dariyā-e-Yardan ke pār us jagah chalā gayā jahāñ Yahyā shurū meñ baptismā diyā kartā thā. Wahāñ wuh kuchh der ṭhahrā. Bahut-se log us ke pās āte rahe. Unhoñ ne kahā, “Yahyā ne kabhī koī ilāhī nishān na dikhāyā, lekin jo kuchh us ne is ke bāre meñ bayān kiyā, wuh bilkul sahī niklā.” Aur wahāñ bahut-se log Īsā par īmān lāe.